

約章殊案匯覽

欽此

政務處等附奏從嚴甄別外務部滿漢章京片

光緒二十七年

再總理各國事務衙門舊有章京滿漢共四十八員其認真得力者固不乏人而濫竽充數者實亦不少當此改設專缺之時亟宜嚴定去留任缺毋濫庶以挽回積習策勵人才擬請

旨飭下該王大臣從嚴甄別其不得力者即咨回原衙門當差嗣後留署及續傳人員仍當認真察看如果於交涉事件未能諳習亦即隨時咨回毋稍遷就是否有當伏乞

聖鑒謹

奏

政務處等附奏原派軍機章京仍舊兼行外務部片

光緒二十七年

再從前總理各國事務衙門由軍機處揀派滿漢章京各四員兼該衙門行走以備傳鈔機密事件現在改設外務部所有原派軍機章京各員擬請照舊兼行毋庸開支養廉銀兩是否有當謹附片具陳伏乞

聖鑒謹

奏

外務部奏議覆前出使大臣呂奏請設和蘭屬地領事摺

光緒二十八年

奏為遵

旨議奏恭摺仰祈

聖鑒事光緒二十七年十二月二十五日前出使德和國大臣呂海寰奏和蘭屬地僑寓華民亟宜設法保護添派領事一摺奉

硃批外務部議奏欽此欽遵由軍機處鈔交到部

臣等查泰西各

國於南洋各島經營開埠以和蘭為最先華民往彼謀生者歷年既久人數倍多洋官之徵取無藝地主之凌虐百端亦以和屬為最甚前於光緒十三年兩廣總督張之洞派員訪查得知梗概迭經臣衙門與各出使大臣籌商擬在噶羅巴

等處設立領事和外部一意推阻迄難就議茲據該大臣奏稱迭接該處華商等稟報密察情形其種種苛待華民更甚於昔亟宜設立領事以資保護屢與和外部反覆辯論已有端緒查和屬應設領事者七處如噶羅巴三寶瓏泗里丕望加錫勿里洞日里文島均關緊要今惟噶羅巴設立總領事為萬不可緩等語臣等覆查南洋各島如英屬之新嘉坡美屬之小呂宋皆已設立總領事

朝廷一視同仁必不忍和屬僑氓獨抱向隅之憾惟該國以各島為外府因我設立領事恐不免以猜忌之心仍作宕延之計必須援據公法查照成案再三與之申辯始可漸就範圍

原奏所稱現在重訂商約正可及時聲明凡各國通商口岸及各島嶼華民華工萃集之處中國查看情形隨時均可商設領事請

飭商約大臣會商外務部趁此訂約之時與和蘭增入中國可在噶羅巴島等處設立領事之條各節原以補從前條約所未備前據盛宣懷來電擬交英使各款已有英國允中國可派領事駐紮英國及英國屬地一條英國如能商允和蘭亦易援辦呂海震現經奉

旨留滬會辦商約自可與盛宣懷隨時相機籌議其和外部既經議有端緒應即責成接任出使大臣蔭昌與該外部申理前

說切實磋商內外堅持力辯此事務期得當至所需經費應俟添設領事議定後再由臣部酌照章程奏明辦理所有臣等遵議緣由理合恭摺覆陳伏乞

皇太后

皇上聖鑒謹

奏 光緒二十八年二月二十六日奉

硃批依議欽此

出使德和大臣呂奏請設領事保護僑寓和屬南洋華民摺
光緒二十七年

奏為和蘭屬地僑寓華民亟宜設法保護添派領事以安生計

而廣

皇仁恭摺仰祈

聖鑒事竊查和蘭南洋各島開埠最早華民之往彼謀生者亦最夥而噶羅巴一島尤為薈萃之區其屬有三十餘府寄居之華民不下六十萬人初尚優待後因迫令入籍遂致鼓噪被戕者幾及十萬人殺戮之慘暗無天日厥後苛政繁興種種凌虐擢髮難數推原其故以中國未經設立領事以保衛之也查前任出使大臣薛福成許景澄等迭經函商總理衙門暨北洋大臣兩廣總督籌商保護之法均以設立領事為最要關鍵惟中國與各國訂立通商條約當時未悉洋情又視

設立領事無足重輕故約內祇載各國可於中國各通商口岸設立領事未載中國可在各國口岸設立領事明文以致中國欲在各國口岸添設領事無不多方阻止雖俄續約有中國欲在俄羅斯京城或別處設立領事官亦聽中國之便德續約有凡德國各處准各國領事官駐紮者中國亦可派員駐紮中法越南條約有中國可在河內海防二處設立領事官各等語乃至今未能設立唯秘魯巴西日本墨西哥條約有彼此均可設立領事一款中國業已擇要舉行而中國與和蘭所訂之約未經聲明和外部即以此阻撓噶羅巴各島添設領事屢議未成職是之故臣充總理各國事務衙門

章京時即習聞之嗣於光緒二十三年欽承

簡命出使德和兩國時以此事為念迨放洋後至新嘉坡其時駐

紮新嘉坡總領事候選道張振勳過船謁見臣以該道熟悉

南洋各島情形即詢以僑寓和屬噶羅巴等處之華民和人

相待如何據稱和國國家尚無惡意惟噶羅巴等處之地方

官擅立苛政待我僑寓之華民奴隸不若不與各國人一律

看待華民之獨受凌虐皆因中國未設領事之故等語臣查

檔案光緒二十三年兩廣總督臣張之洞曾派員藉查訪商

務為名探苛待華民之實爾時和廷頗萌疑忌經許景澄力

為剖白只以推廣商務為詞始免饒舌是領事之設彼不樂

從情節顯然旋有寓和職商陳仕林公稟詳陳和屬虐待各情臣到任後亦接有噶羅巴華商等密稟近來苛虐情形更甚於昔急迫控訴並聲明不敢露出姓名恐彼族聞之以後即難在該處經商云云臣查前後各稟內稱有所謂瑪腰者甲必丹者雷珍蘭者俱係管理華人之名目和官以華人之生長於此者充之該瑪腰等仰承和官鼻息初不過承命行事繼且擅作威福甘為屬階設禁斂錢無所不至種種不法皆瑪腰等主之以中國之人欺中國之民可謂喪心昧良然其入和籍已久漸不知為我

天朝之百姓固無足怪其所設苛政如華人初到和地概入公

堂問過口供報明註冊或赴各鄉營生須經和官批准方許
前往嗣忽下不准華民居鄉之例限二十四點鐘立將生意
產業賤售於土番逾限則罰銀後仍行逐出將平日之產業
片刻即消歸烏有一時華民扶老攜幼哀聲動地而和人毫
無憐惜之意此其一也又華人到和屬地向來必須有和官
憑照方准登岸有此憑照即可前往無阻嗣又變立新例凡
登岸者無論有無憑照登岸後地方官帶至衙門用繩圈歸
一處挨為查點其老客有原日出口憑照者即放行若新客
則統飭差役驅入繩圈內一體帶入瑪腰公館逼令映像有
人擔保者始為放出如覓不得擔保則帶至地方官衙門上

錄刑具俟有輪船再驅出境華民奔走數十萬里以謀衣食甫到其境無辜被刑川資用罄依賴無門殞身異域為之慘然此又其一也又華人在此處貿易必須先由此處領一路票除使費不計外應繳印花銀若干既到彼處又須在彼處掛號再繳銀若干如一日到三處五處貿易則兩頭繳費亦須三次五次萬一掛漏查出後從重加罰必使其虧本而後已而多方留難耽延時刻猶其小焉者也此又其一也又華人遇有詞訟之事審費照西人至多之例核算科罪又照土番至重之例辦理縱令理可得直而追回銀數往往不敷狀師之費因此含冤負屈者不可勝計此又其一也又華人經

商和屬地所有家資產業雖妻子兒女不得私相授受如遇身故者資產即歸入公所當初設此公所其章程由華人訂定事務由華人經理必俟其子孫前來領取均有桑梓之誼故無不竭力經營也今則權歸和政府華人之子孫執遺囑援照章程向公所領取者和官必多方挑剔反復延宕如無遺囑或暴病不及遺囑於親屬者則所有產業概沒入官雖叔姪親串不能過問此又其一也又華人在日里地方承種菸葉往往有奸販誘惑無知愚民出洋販賣強壯者身價五六十元或八九十元不等少弱者或三四十元訂立字據以三年為期即以種菸之息償其身價入園後不准擅自出入

雖父兄子弟不能晤面於是尅扣工資盤剝重利諸弊叢生
工人莫不垂頭喪志忍氣吞聲呼籲無門且升科闢地各國
人民皆得購地種菸獨華人不能此又其一也以上苛虐各
節已令人慘不忍聞正擬設法向和外部理論間忽新嘉坡
商人寄呈英文報一紙內載班喀地方華人在錫礦各廠作
工苦不可言礦廠大半在山窪山水下流廠主不設抽水機
華工日在水中既患潮溼又係枵腹故染病最易況天氣炎
熱異常時症不息死者枕籍廠主開設布店逼勒華工在此
購買什物貨質極劣價值極昂所得蠅利日用不敷偶有急
需支借工資按月納息支借一兩納息五錢故若輩雖勤不

免糲食華工積憤已久遂聚集三百餘人名曰三指會猝然起事廠主先知消息遂開槍轟擊死傷者不計其數登時逃散地方官拏獲多名窮詰再三實因不堪廠主及監工人苛待所致允為申理始照舊作工華工素循規矩若非所待太苛必不至於啟釁等語臣展閱之下起然心傷竊思華民僑寓南洋各島向以作工為業平日已不勝其苦茲復任意凌虐其情形與古巴之夏灣拏招工同一慘忍是領事之設斷難再緩臣迭與和外部大臣樸福爾再三申論并譯錄商稟及新報將苛待情形詳細述之并備文照會請其允設領事以保我僑氓生計乃該外部以事屬藩部不能作主為詞并

云華工在彼處相安已久決無苛待情事不可聽信一面之辭且擬設領事必須先立專約纔能商辦意在延宕又經臣反覆開導始允商之藩部派員往查再為徐議嗣聞和藩部派香港總領事得羅在信前往查看臣當即致函該總領事請其相助俾償和屬各島華工之願乃日久無信迭經臣函催和外部連復延緩數月始於去年二月間據和外部大臣照復聲稱華民稟訴各節多有不實不盡之處凡各國設立領事應管分內之事稽查本國商務至詞訟等事不能逕達國家須由駐和使臣與和政府商辦各領事無干預之權華民首領雖有協理地方之責向由該處總督自行選派現藩